

Govor supervizora Rodericka Moora na svečanoj akademiji obilježavanja 12. godišnjice Distrikta Brčko

Dobar dan Brčaci, sretan praznik!

Prije svega, ja bih želio da čestitam Brčankama 8. mart, Međunarodni dan žena, i pretpostavljam da danas nema sretnijih bića na planeti od Brčanki koje proslavljaju dupli praznik. Sretan praznik!

Velika je čast danas za Distrikt što su ovdje sa nama mnogi predsjednici, ministri, ambasadori i mnoge druge ugledne zvanice. Ja sam počastvovan što sam ovdje danas sa vama.

Sjećam se kada sam stajao ovdje pred vama prošle godine i kada sam govorio o povezanosti, o bliskosti koju osjećam sa ovom zajednicom i sa njenim ljudima. Danas vam mogu reći da je ta spona, ta bliskost tokom protekle godine postala još jača. To je spona koja se gradila putem velikog broja susreta sa časnim, dobronamjernim i gostoprimaljivim ljudima iz Distrikta. Ljudima iz mjesta kao što su Šatorovići, Brezovo Polje, Gorice, Donji Zovik, Brka, Trnjaci, Bukvik, Marković Polje, Boderište, Plazulje, Vukšić, Boče i iz mnogih drugih mjesnih zajednica.

Pored toga, mogu da vam kažem da moje divljenje onim što ste vi postigli kao zajednica i onim što nastavljate da postizete je u velikoj mjeri raslo. Možda ste čuli da je prvi supervizor Robert William Farrand nedavno objavio knjigu o periodu koji je ovdje proveo kao supervizor. Moram reći da je Brčko iz 1997. godine, koje opisuje gdin Farrand, miljama daleko od Brčkog koje ja danas poznajem. Razrušene zgrade, devastacija, ljudi bez svojih domova, ogroman broj raseljenih osoba, kontrolni punktovi na sve strane, sveprisutna mržnja i očajanje – svega toga uglavnom više nema. Pored toga, iako su ožiljci rata ovdje još prisutni, ja bih rekao da su društvene i političke podjele sve manje. Dat ću vam jedan primjer: nedavno mi je šef Policije Distrikta Brčko rekao da su tokom 2011. godine bila zabilježena 2 ili 3 međunacionalna incidenta na teritoriji Distrikta, a nijedan od njih nije bio nasilan. Mislim da je to stvarno nevjerojatno. Nevjerojatno kad se uzme u obzir šta se desilo ovdje tokom '90-ih – zvjerstva, grozote, masovne grobnice, raseljene osobe, logori, itd.

Ovakav razvoj situacije, po mom mišljenju, omogućava izgradnju normalnog, časnog i inkluzivnog društva 21. vijeka.

Naravno, svi znamo da trenutna situacija ovdje nije savršena. Brčko nije El Dorado, kako mi je nedavno rekao jedan Brčak, iako neki izvan Brčkog tako misle. Vlastitim očima sam video previše porodica koje jedva sastavljaju kraj sa krajem, previše zajednica koje jedva podnose teret siromaštva, nezaposlenosti i previše mladih ljudi koji svoju budućnost ne vide ovdje.

Postoji još jedan suštinski izazov sa kojim se suočava ova zajednica – raširena korupcija.

Vi ste mi rekli da ste siti korupcije, da ste siti mita, veza i provizija koje vidite po javnim institucijama. Ipak, kako mi se čini, institucije za provođenje zakona počinju ozbiljnije da se upuštaju u borbu protiv korupcije. Naravno, one imaju i imat će aktivnu podršku moga ureda i međunarodne zajednice. Međutim, uvjeren sam da će dobiti ovu bitku samo ukoliko građani i ovdašnje političke stranke budu aktivno, glasno i bezrezervno odbacili korupciju i zahtijevali da njihove institucije pokažu rezultate.

Ovo su zaista teški izazovi – ja to znam, ja to priznajem. Ima i mnogo drugih koje nisam ni naveo. Međutim, mogu da vam kažem da unutar međunarodne zajednice postoji jasan i snažan konsenzus da se Distrikt Brčko kreće u pravom smjeru i da može prevazići poteškoće sa kojima se suočava. Na tom uvjerenju se zasnivaju i ozbiljni razgovori o budućnosti supervizije, koji su trenutno u toku.

Ono što je meni važnije od toga je da građani stalno ukazuju kako su dovoljno mudri i odgovorni da rješavaju probleme – tolerantno, poduzetno i na način koji će postaviti Distrikt na čvrste temelje za buduće godine.

Hvala na pažnji!